

JESU-KRISTO ANG GINUO



Ang Matun-an Nimo Sa Sini Nga Leksyon

Kagamhanan subong nga Ginuo
Titulo sang kagamhanan
Kalig-unan sang kagamhanan

Pagkilala subong nga Ginuo
Ulo sang iglesia
Hari sang mga hari kag Ginuo sang mga ginuo

Kagamhanan subong nga Ginuo

Nagatuo ka bala kay Jesus subong nga imo Ginuo ang isa nga nabanhaw gikan sa mga minatay? Tuman gid ini ka malahalon. Nagasandig diri ang espirituhanon mo nga kabuhi.

Mga Taga Roma 10:9. Bangod nga kon itoad mo sang imo baba nga *si Jesus Ginuo* kag magtuo sa imo tagipusoon nga ang Dios nagbanhaw sa iya, maluwas ka.

Titulo sang kagamhanan

Ano bala ang buot silingon sang mga katawhan sang gintawag nila si Jesus nga Ginuo? Ngaa gingamit ni Pablo ining titulo para kay Jesus sing kapin sa 200 ka beses? Ano bala ang kahulogan sang magtuo kay *Ginuong* Jesu-Kristo agud maluwas? Ngaa bala nga nagsiling ang Dios nga ang tagsa ka dila magtuad nga si Jesus Ginuo?

Kurios, ang tinaga nga Griego nga ginbadbad *Ginuo* sa Biblia, isa ka titulo sang kagamhanan. Ginagamit sang mga katawohan ini sa pagpakita sang pagtahud. Mahimo ini nga isa ka matinahuron nga pagtawag sa isa ka tawo, katulad sang Inglis nga "sir" (*ginuo*). Ang ulo sang isa ka panimalay amo ang ginuo*sa iya balay. Ginatawag sang mga sulogun ang ila agalon nga ginuo. Ang mga katawohan sang isa ka pungsod nagatawag sang ila pangulo nga ginuo.

Ang *Kurios* titulo man sang pagsimba nga ginpatuhoy sa mga dios sang madamo nga mga relihiyon, kag ginapatuhoy man kay Jehovah, ang matuod nga Dios. Sa sini nga paghangop, ang Biblia nagagamit sang titulo nga Ginuo para sa Dios nga Amay kag sa Iya Anak nga si Jesu-Kristo. Ang magtawag kay Jesus nga *Ginuo* nagakahulogan sang

pagkilala sang Iya pagka-Dios, sang Iya pagkaisa sa Amay, sang Iya indi matupongan nga kagamhanan sa ibabaw sang kalibutan, kag sang Iya kinamatarung sa pagdumala sa aton mga kabuhi.



Kon si Jesus ang aton Ginuo, nagapalapit kita sa Iya sa pagbaton sang Iya mga sugo kag mga instruksyon. Ginadala naton ang tanan sa Iya sa pagpangamuyo. Ang sulondan naton para sa adlaw-adlaw nga pagkabuhi amo ang Iya mga Pulong. Indi na kinahanglan nga magpalibog pa kita nahanungod sa bisan ano pa. Ang tanan nga gahum yara sa aton Ginuo, nahibaloan Niya ang tanan, kag nagahigugma Sia sa aton. Ang aton lamang pagabuhaton amo ang pagsalig kag ang pagtuman sa Iya.

Buhata Ini

1. Sauloha ang Mga Taga Roma 10:9.
2. Ang *Ginuo* isa ka titulo nga nagapahayag sang:
 -a) pagkilala sang kagamhanan.
 -b) pagkilala sang pagkaangay sang tanan.
 -k) pag-updanay.
3. Pila ka beses nga gintawag ni Pablo si Jesus nga Ginuo?

.....

.....
4. *Hunahunaa*: Ano ang buot mo silingon kon magtawag ka kay Jesus nga *Ginuo*? Isa lamang bala ini ka matinahuron nga pagtamyaw? Tubtob sa ano ang pagka-Ginuo Niya sa imo?

Kalig-unan sang kagamhanan

Ginpamatud-an ni Jesus ang Iya kagamhanan sa Iya mga ginatudlo. Nagakatingala ang mga katawhan sa Iya bug-os nga kapat-uran sang Iya pagpahayag sang kamatuoran nahanungod sa Dios kag sa tawo. Gintawag Niya ang Iya kaugalingon nga dalan, kamatuoran, kag ang kabuhi.

Ginpamatud-an ni Jesus ang Iya kagamhanan sa kinaiya sang kalibutan. Naglakat Sia sa ibabaw sang mga balod. Ang Iya mga pulong nga, 'Maglinong! Magpuas,' nakapakanay sang mamadlos nga unos. Ang tubig ginhimo Niya nga alak. Ginpakaon Niya ang 5,000 ka mga lalaki sing lima ka piraso nga tinapay kag duha ka magamay nga isda.

Ginpamatud-an ni Jesus ang Iya kagamhanan sa balatian kag kamatayon. Sa Iya pagtandog, ang bungol nakabati, ang bulag nakakita, ang piang nakalakat. Ang patay ginhatagan Niya liwat sing kabuhi. Napatay Sia kag nabanhaw liwat.


Ginpamatud-an ni Jesus ang Iya kagamhanan moral. Nagkabuhi Sia sang isa ka walay sala nga kabuhi. Nagpasad Sia sang pinakamaayo nga sulondan sa kabuhi. Ang mga guba nga kabuhi ginhimo Niya nga matahom, putli kag mapuslanon. Isa Sia ka himpit nga pangulo.

Ginpamatud-an ni Jesus ang Iya espiritwal nga kagamhanan. Ginpatawad Niya ang mga sala. Gintabog Niya ang mga malaut nga espiritu paggowa sa ila mga biktima. Ginbuhat Niya ang mga bulohaton sang Iya Amay kag ginpahayag ang Dios sa tawo. Nagbalik Sia sa langit kag ginpadala ang Balaan nga Espiritu sa iglesia sang Dios.

Ginpamatud-an ni Jesus ang Iya kagamhanan sa Iya iglesia. Subong nga Ginuo, ginpadala Niya ang Iya mga sumolunod sa pagpalapnag sang ebanghelyo kag ginhatagan sila sang indi kinaandan nga gahum sa pagtuman sang ila misyon. Samtang ginatuman naton ang Iya sugo ginasakdag Niya kita sang tanan nga kagamhanan sang langit.

Juan 13:13. *Kamo nagatawag sa akon nga Manu-nodlo kag Ginuo; kag husto ang ginasiling ninyo, kay amo ako.*

Mateo 28:18-20. *Ang bug-os nga pagbulot-an sa langit kag sa duta natugyan sa akon. Busa lakat kamo kag himuon nga mga gintuton-an ang tanan nga mga kapungsoran, nga nagabautiso sa ila sa ngalan sang Amay kag sang Anak kag sang Espiritu Santo, nga Nagapanudlo sa ila sa pagtunan sang tanan nga ginsugo ko sa inyo; kag yari karon, ako kaupod inyo sa gihapon, tubtob sa katapasan sang katuigan.*



Buhata Ini

5. Sauloha ang Juan 13:13.
6. Ano ang ginsugo ni Jesus sa Iya mga sumolunod nga itudlo sa mga katawohan nga ila nabautisohan?
 -a) Sa pagtindug sang dalagku nga mga kasimbahanan.
 -b) Sa pagtuman sang tanan nga ginsugo Niya.
 -k) Sa pagsunod sang Iya halimbawa.

7. Isulat ang numero sang sari sang kagamhanan nga yara sa wala sa kalig-unan nga yara sa tuo.
- | | |
|------------------------------|-----------------------------|
| 1) espiritwal | ...a) gin-ayo ang masakiton |
| 2) moral | ...b) ginpakanay ang unos |
| 3) sa kinaiya sang kalibutan | ...k) ginpadala |
| 4) sa iglesia | ...d) ginpatawad ang sala |
| 5) sa balatian | ...e) pagkabanhaw |
| 6) sa kamatayon | ...g) sulondan |
8. *Hunahunaa:* Kon magpangamuyo bala kita ginakilala naton ang kagamhanan ni Jesus sa sining mga butang?

Pagkilala subong nga Ginuo

Sa kalibutan karon, ginakilala sang iglesia si Jesus subong nga Ginuo. Sa langit, si Jesus yara sa ibabaw sang tanan nga gahum espiritwal. Kag sa pila ka adlaw ang bilog nga kalibutan magakilala sa Iya subong nga Pangulo kag Ginuo.

Mga Taga Efeso 1:20-22. Nga nahimo niya kay Kristo sang ginbanhaw niya sia, kag ginpalingkod sia sa tuo niya sa langitnon nga duog, nga labaw pa gid sa tanan nga pagdumala kag pagbulot-an kag gahum kag pagkagino, kag labaw sa tagsa ka ngalan nga giinhingalanan, indi lamang sa sining panuigon kundi man sa palaabuton; kag ginpasakup niya ang tanan nga butang sa idalum sang iya mga tiil kag ginhimo sia nga ulo sa tanan nga butang tungod sa iglesia.

Ulo sang Iglesia


Ang tanan nga nagbaton kay Jesus subong nga ilar Manluluwas kag Ginuo amo ang mga katapo sang Iya iglesia. Sa apat ka mga sulat ni Pablo nagsugid sia sa aton nga si Jesus amo ang aton Ulo kag ang iglesia amo ang Iya lawas. Natun-an naton ang mga prebilihio sang pagpakig-angot kay Kristo. Ang prebilihio nga ini mahimuslan lamang naton sing lubos kon hatagan naton si Jesus sang nahauna nga bahin sa aton mga kabuhi. Ang ulo dapat nga magtuytoy sa lawas; indi nga ang lawas magtuytoy sa ulo. Ang tagsa ka katapo may kaugalingon nga bahin kag bulohaton sa lawas. Kinahanglan nga maghiliugyon kita tanan sa aton bulohaton para sa kaayohan sang lawas kag sa pagpatuman sang katuyoan ni Kristo nga aton ulo.

Mga Taga Colosas 1:17, 18. Sia una sa tanan nga butang, kag sa iya ang tanan nga butang nagatingub.

Sia ang ulo sang lawas, nga amo ang iglesia: sia amo ang ginsugoran, ang panganay gikan sa mga patay, agud nga sa tanan nga butang mangin nahauna sia

Mga Taga Roma 12:5, 6.

Amo man kita bisan madamo, isa ka lawas kay Kristo, kag ang tag-satagsa ka bahin sang isa kag isa. Sa may hiyas kita nga nagakatuhay-tuhay suno sa bugay nga ginhatag sa aton, gamiton naton sila.



Sa wala pa mapasad ni Jesus ang Iya ginharian sa duta. dalhon anay Niya ang Iya iglesia sa langit kag handaon kita sa pagdumala kaupod Niya. Pagahukman Niya kita tanan — ang aton mga kapaltahan kag mga kapas-

lawan, kag pagapadyaan kita sa bisan ano nga nahimo naton para sa Iya. Ang Iya pagsulondan kinahanglan nga mapasad sing lubos sa tagsa ka bahin sang aton mga kabuhi bag-o kita magdumala kaupod Niya sa walay katapusan Niya nga ginharian.

2 Mga Taga Corinto 5:10. Kay kinahanglan kita tanan ipahayag sa atubangan sang lingkoran nga hukmanan ni Kristo, agud nga ang tagsatagsa magbaton sing maayo ukon malain, suno sa iya nahimo sa lawas.

May daku nga pagsaulog sa langit nga ginatawag panihapon sa kasal sang Kordero, pagkatapos sang paghukom. Mabasahan naton ini sa Bugna. Sa Bugna gintawag si Jesus nga Karnero sing duha ka pulo kag siyam ka beses. Amo ini ang Iya titulo sang kadungganan pagkatapos sang pagbalik Niya sa langit. Nagapakigbahin man ang iglesia sa amo nga kadungganan subong nga nobya sang Kordero.

Bugna 19:5-8. Kag sa trono naggikan ang tingog nga nagsinggit, 'Dayawa ninyo ang aton Dios, tanan kamo nga ulipon niya, kamo nga nahadlok sa iya, magamay kag dalagku.' Niyan nabatian ko ang daw tingog sang dakung kadam-an, subong sang daganas sang madamong tubig kag subong sang tunog sang mabaskug nga mga daguob, nga nagsinggit, 'Alleluya! Kay ang Ginuo nga aton Dios nga Makaako nagahari. Magkalipay kita kag magkasadya sing lakas kag maghimaya sa iya, kay ang kasal sang Kordero nag-abut kag nakaaman na ang iya Nobya; ginhatag sa iya ang pagpanapot sing lino nga manipis, nga masiga kag lubos.' Kay ang lino nga manipis amo ang mga buhat nga matarung sang mga balaan.

Buhata Ini

9. Gintaway ni pablo si Kristo nga
kag ang iglesia amo ang Iya
10. Sa diin mo makita ang nagakaigo mo nga
bahin sa kabuhi?
11. Sin-o ang dapat makaangkon sang nahauna
nga lugar?
12. Nahauna bala si Jesus sa imo kabuhi? Paano
mo ginatuman ang imo bahin sa Iya lawas?
Nalipay ka bala nga mangin bahin sang Iya
nobyas?

Hari sang mga hari kag Ginuo sang mga ginuo

Magtulok kita sa palaabuton kag tulokon si Jesus sa Iya himaya, agud nga mabug-os ang larawan sang kon si sin-o si Jesus.

Bugna 1:7, 8. Yari karon, nagakari sia kaupod sang mga panganud, kag ang tagsa ka mata makakita sa iya. . . 'Ako ang Alpha kag ang Omega,' nagasiling ang Ginuong Dios, nga amo karon kag amo anay kag nga magakari ang Makaako.

Ang Alpha kag ang Omega amo ang nahauna kag ang naulihi nga letra sang abakada sa Griego, ang ginsugoran kag ang katapusan. Si Jesus amo ang Alpha — ang nahauna nga kabangdanan, ang ginhalinan sang tanan nga kamatuoran. Si Jesus amo ang Omega — ang Isa nga makahatag sang katumanan sa walay katubtoban nga katuyoan sang Dios. Ang tanan ipahamtong Niya sa nagakaigo nga kaangtanan. Lutoson Niya ang malaut kag magahari sing walay katubtoban subong nga Hari sang mga hari kag Ginuo sang mga ginuo.

Ginlaragway ni Jesus ang makahalanguyos nga mga tinion nga magaabot bag-o Sia magbalik. Ang Bugna naga-hatag sang madamo nga mga detalye: inaway, balatian, linog, gutom, mahigko nga tubig, pagkalamatay sang isda, pagkapapas sang mga tanom, paglupig sa idalum sang diktador sang kalibutan — kamatay sa bug-os nga duta.

Salamat sa Dios kay indi amo ina ang katapusan. Bisan pa nga ang sala nagdala sang mga pag-antos kag kamatayon, nagtubos si Kristo sang mga katawhan para sa Iya kaugalingon kag nagtubos man sining duta agud nga tindugan sang himpit Niya nga ginharian. Si Jesus amo ang Omega. Magabalik Sia sa madali nga tion sa pagkuha sang kalibutan nga gintuga Niya paagi sa Iya gahum kag gintobos sang Iya dugo.

Bugna 19:11, 13, 14, 16. Niyang nakita ko nga nabuksan ang langit, kag yari karon, ang kabayo nga maputi! Ang nagasakay sa iya gintawag Matutom kag Matuod, kag sa pagkamatarung nagahukom kag nagapakig-away sia . . . kay ang iya ngalan ginatawag 'Ang Pulong Sang Dios' kag ang hangaway sang langit . . . nagasunod sa Iya . . . Sa iya panapton nga malaba kag sa iya paa may nasulat sia nga ngalan, 'Hari sang mga hari kag Ginuo sang mga ginuo.'

Mateo 24:30; 25:31, 32. . . . 'Ang tanan nga kabikahan sa duta . . . makita nila nga nagakari ang Anak



sang tawo sa ibabaw sang mga panganud sa langit nga may gahum kag dakung himaya. Kon magkari ang Anak sang tawo sa iya himaya, kag ang tanan nga manugtunda kaupod Niya, niyang magalingkod sia sa iya mahimayaon nga trono. Tipunon sa atubang niya ang tanan nga pungsod.'

Isaias 11:4, 6, 9; 35:1, 5, 6, 10. Kundi magahukom sia nga may pagkamatarung sang mga imol, kag magahusay nga may pag-alangay sa mga mahagup sang duta . . . Ang lobo magapuyo kaupod sang kordero . . . kag ang tinday nga baka kag ang leon nga tutoy kag ang pinatambok magatingub, kag ang bata magatuytoy sa ila. Indi sila maghalit ukon maglaglag sa bug-os ko nga bukid nga balaan; kay ang duta matugob sang pagkilala sa Ginuo subong nga ang mga tubig nagatabon sang dagat.

Ang kamingawan kag ang duta nga kigas magakasyadya, ang desierto magakalipay kag magapamulak; subong sang rosa. Niyan ang mga mata sang mga bulag pamuklaton, kag ang mag igdulogog sang mga bungol mabuksan; niyan ang piang magalumpat subong sang usa, kag ang dila sang apa magaaamba. Kay ang mga tubig magagowa sa kamingawan, kag ang mga ilig sa desierto.

Kag ang mga tinubos sang Ginuo magabalik, kag magaabut nga may inamba sa Sion, ang dayon nga kalipay manginsa ila mga ulo; magaaagum sila sing kasadya kag kalipay, kag ang kasubo kag ang panghayhay magapalagyo.

Bugna 21:3-5. 'Yari karon, ang kayangkayang sang Dios upod sa mga tawo. Magapuyo sia kaupod nila, kag sila mangin iya katawohan, kag ang Dios gid magaupod sa ila; pahiran niya ang tagsa ka luha sa mga mata nila, kag wala na sing kamatayon, ukon kalisud ukon paghibi ukon kasakit pa, kay ang nahaunang mga butang nagtaliwan.' Kag ang nagingkod sa trono nagsiling, 'Yari karon, ginbag-o ko ang tanan nga butang.'

Indi mo matun-an ang tanan nga titulo ni Jesus sa sining malip-ot nga tulon-an mabasahan ang tanan naha-

nungod sa tumalagsahon Niya nga ginharian. Sa pihak nga bahin, nagalaum kami nga labi mo nga nakilala si Jesus karon sang sa una mo nga pagkilala sa Iya, kag nga ginahigugma mo Sia sing labi karon. Nagapangamuyo kami nga magadugang ang pagkilala mo sa Iya adlaw-adlaw samtang nagahulat ka sa Iya pagbalik. Kag sa pila ka adlaw makita mo Sia nawong sa nawong kon mag-abot na Sia, kag makilala Sia subong nga kon ano gid Sia, kag maka-buylog sa kalibutanon nga pag-amba sang pagdayaw sa Kordero:

Bugna 5:9-13. Kag nagaamba sila sing bag-ong ambahanon, nga nagasiling, 'Takus ka sa pagkuha sang tulon-an nga linukot kag sa paghukas sang iya mga pat-in, kag gin-ihaw ka kag gintubos mo sa Dios sang imo kaugalingon nga dugo ang mga tawo,

Sa tagsa ka kabikahan kag hambal kag katawohan kag pungsod, kag ginhimo sila nga ginharian kag mga sacerdote sa aton Dios, kag magagahum sila sa duta.'

Niyan nagtulok ako, kag nabatian ko sa palibot sang trono kag sang mga sapat nga buhi kag mga tigulang ang tingog sang madamong manugtunda, nga ang kadamuon nila linaksa ka linaksa kag linibo ka linibo, nga nagsiling sa mabaskug nga tingog.

'Takus ang Kordero nga gin-ihaw, sa pagbaton sang gahum kag manggad kag kaalam kag kusog kag dungog kag himaya kag pagpakamaayo!'

Kag nabatian ko ang tagsa ka tinuga nga yara sa langit kag sa duta kag sa idalum sang duta kag sa dagat, kag sang tanan nga yara sa ila nga nagasiling,

'Sa nagalingkod sa trono kag sa Kordero ang pagpakamaayo kag dungog kag himaya kag kagamhanan sa katuigan kag katuigan!'

Buhata Ini

13. Sa wala pa nimo mabuhat ang ginapabuhat sa sini nga bahin, balika kag basaha ang nahauna nga pahina sang tagsa ka leksyon. Tinguhai sa pagpanumdom sa imo masarangan ang nahanungod sa tagsa ka punto. Balika sing makadali ang tagsa ka leksyon. Hunahunaa kon ano ang kahulogan sang tagsa ka punto kon gamiton sa imo kaugalingon. Magpakighambal ka kay Jesus nahanungod sini.
14. Karon, balik sa sini nga bahin – Ihatag ang tatlo ka titulo ni Jesus sa Bugna 19.
.....
.....
.....
15. Ang solo nga paglaum para sa kalubaran sang palaligban sang kalibutan amo ang:
....a) maayo nga mga paagi sang siyensya.
....b) kalibutanon nga edukasyon.
....k) maayo nga sistema sa politika.
....d) pagbalik ni Jesus subong nga Hari.
16. Basaha liwat ining leksyon. Linyahi ang mga dinalan nga naluyagan mo sing labi.
18. Usisaa ang imo mga sabat kag sulati ang imo rekord sang bumolutho para sa leksyon 10.
17. Basaha ang ambahanon sang Kordero subong nga nagapakighambal ka kay Jesus. Pasalamatia Sia bangod sang Iya pagkamatay sa pagluwas sa imo.

Leksyon 10 – Mga Sabat

Ang mga pamangkot nagakinahanglan sang 17 ka mga sapat. Ang husto nga sapat halin sa 15 tubtob sa 17, labing maayo; 12 tubtob sa 14, maayo; 9 tubtob sa 11, kasarangan. Kon manubo sa 9 ang husto mo nga sapat, basaha liwat ang leksyon.

2. a) Pagkilala sang kagamhanan.
3. Kapin sa 200 ka beses.
6. b) Sa pagtuman sang tanan nga ginsugo Niya.
7. 5-a; 3-b; 4-k; 1-d; 6-e; 2-g
9. Ulo, lawas
10. Sa pagpakig-angot kay Jesus.
11. Jesus
14. Matutom kag Matuod, Pulong sang dios, Hari sang mga hari kag Ginuo sang mga ginuo.
15. d) Pagbalik ni Jesus subong nga Hari

Kadamuon sang husto nga sapat. . . . Grado

Karon sulati ang imo rekord sang bumolutho para sa leksyon 10.

PANGIBULAHAN!

Nagapangibulahan kami sa imo pagtapos sa sini nga kurso. Nagasalig kami nga isa ka daku nga bulig ini sa imo. Subong man ang iban pa nga mga kurso sang ICI. Kon wala pa ikaw makapalista sa madason nga kurso, buhata ina sa tion sang pagpadala mo sang imo rekord sang bumolutho diri sa amon talatapan.